

---

**DIE 26 APRILIS**

**IN FESTO  
BEATI IOANNIS BOSCO CONF.**

**IN II NOCTURNO.**

LECTIO IV.

Ioánnes Bosco, húmili loco natus apud Castrum Novum in Asténsibus atque sanctíssime, patre amíssio, disciplína matérna institútus, mira de se vel a prima aetáte porténdit. Ingénio enim mitis atque ad pietátem pronus, singulári se gerébat auctoritáte inter aequáles, quorum lites dirímere, fácales rixas compónere, túrpia verba iocósque lascívos compéscere, matúre coepit. Tum verbis eos iucúndis ad se advocáre, ludis preces insérere, quae in templo arripúisset mirábili sermónis copia ac dulcédine reférre, ad Poeniténtiae et Eucharístiae sacraménta rite suscipiéndá puérulos quam primum quamque crebérrime indúcere satégit. Oris quoque decor verecúndus, morum elegántia, rerum verborúmque memória plane singuláris permágnam ómnibus de eo expectatióem movébant. Licet vero, familiaris rei angústia pressus, labórum aerumnarúmque plenam adolescéntiam egíisset, id tamen unum hílaris ac Deo fidens conténdit, ut sacerdotío augerétur.

LECTIO V.

Voti tandem compos efféctus, Augústam Taurinórum pétiit, quo acrius, Beáto Iosépho Cafáссо magístro, et in sciéntia sanctórum proficeret et ad sacram morum doctrínam addiscéndam ánimam

adiungeret. Ibi autem, cum voluntatis inclinatioe tum superno instinctu incitatus, in adolescentulos suum animum convertit, ut prima iis christiana sapientiae traderet rudimenta. Quorum cum fieret in dies maior numerus, sedem ad eos coadunandos stabilem ac firmam, haud sine caelesti afflatu, asperis et diuturnis difficultatibus superatis, in illa urbis parte collocavit, quae vulgo Valdóco appellatur, in eamque rem totus incubuit. Paulo vero post, Virgine Deipara auxiliante, quae ei puerulo per visum in somniis futura omnia aperuerat, Ioannes Salesianorum Societatem instituire decrevit, cuius esset praesertim juveniles animas Christo lucrifacere: item novam familiam suscepit constituendam Sacrarum Virginum, quae, ab Auxiliatrice Dei Matre nuncupatae, adolescentulas dirigerent in vias Domini; quibus demum pium Cooperatorum coetum adiecit ad Salesianorum opera studio ac pietate fovenda. Itaque brevi factum est, ut haud mediocrem civili et christiana societati utilitatem afferret.

#### LECTIO VI.

Animarum enim studio flagrans, nulli pepercit labori nullique impensae, ut festorum asceteria dierum pro adolescentulis, pupillarum hospitia, pusionum operariorum scholas, aedes pueris alendis instituendis, templa Deo longe lateque per orbem excitaret. Simul Christi fidem in Subalpinis verbo et exemplo fovere, tota Italia optimos libros conficiendo edendo divulgando tutari, Evangelii praecones ad gentes infideles saepe mittendo propagare non desiit. Simplex ac rectus homo Dei, ad omne bonum opus instructus, difficile dictu est, quam potissimum virtute praestiterit; nam a teneris annis ad ultimam usque senectutem admirabili morum sanctitate, omnimoda caritate, religione pientissima excelluit. Tria autem pietatis officia suis maxime commendavit: ut quam saepissime ad sacram exhomologesim sacramque synaxim accederent, ut Mariam Auxiliatricem peramanter colerent, ut Pontificem Maximum filiali obsequio prosequerentur. Nec silentio praetereundum est, eum, in difficillimis rerum adiunctis, praesto non semel Romano Pontifici adfuisse, ut mala ex legibus contra Ecclesiam eo tempore latis derivata temperaret. Vitae cursum, tot tantisque operibus ac laboribus refertum, confecit pridie kalendas februarias anno salutiferae redemptionis millesimo octingentesimo octogesimo octavo, aetatis suae septuagesimo tertio. Quem multis ante et post obitum miraculis clarum Pius undecimus, Pontifex Maximus, magna animi sui laetitia in Beatorum numerum retulit.

## IN III NOCTURNO.

Lectio sancti Evangelii secundum Matthæum.

*Cap. XVIII, 1-11.*

### LECTIO VII.

In illo tempore: Accesserunt discipuli ad Jesum, dicentes: Quis, putas, major est in regno caelorum? Et reliqua.

Homilia sancti Joannis Chrysostomi.

(In Cap. 18 MATTH., *Hom. 60*).

Viden quot modis nos inducat Dominus ad curam vel minorum fratrum? Ne itaque dixeris: Aerarius est ille, aut calceorum sutor, agricola, insipiens, ut ideo despicias illum. Ne enim in illud mali incidas, perpēnde quot modis te inducat, ut modeste agas et eorum curam geras. Puerum in medio statuit et ait: Efficiamini ut parvuli: et: Quicumque susceperit parvulum talem, me suscipit: et: Qui scandalizaverit, extrema patietur. Si ergo Deus ita gaudet de parvulo qui repertus est, cur tu despicias eos quos Deus tam sollicite curat, eum oporteret animam ipsam tradere pro uno ex parvulis istis? Tanta quippe est Deo cura de anima, ut ne Filio quidem suo pepercerit. Quare, obsecro, primo diluculo, cum a domo exierimus, hunc unum scopum habeamus et hanc praecipue sollicitudinem, ut periclitantem eripiamus. Non loquor hic de sensibili periculo; hoc enim ne periculum quidem est: sed de periculo animae, quod hominibus parat diabolus.

### LECTIO VIII.

Improbis, inquis, difficile toleratur. Atque ideo debes illi amore iungi, ut eum a vitio removeas, ut convertas et ad virtutem reduces. At non obtemperat, inquis, neque consilium admittit. Unde hoc nosti? An exhortatus es et emendare studuisti? Hortatus saepe sum, inquis. Quoties? Saepius: semel et iterum. Idne saepius vocas? Etiamsi per totam vitam id fecisses, nec deficere, nec desperare oportebat. Non vides quomodo nos Deus semper hortatur per Prophetas, per Apostolos, per Evangelistas? Quid igitur? Num recte operamur? Num in omnibus obtemperamus? Minime. Num ideo finem fecit admonendi?

LECTIO IX.

Nihil quippe tam pretiosum est quam anima: quid enim prodest homini, si mundum universum lucratur, animae vero suae detrimentum patiatur? Verum omnia pervertit et deiicit pecuniarum amor. Deique timorem decussit, sicut tyrannus arcem sic animas occupans. Ideo et filiorum et nostram negligimus salutem. Hinc magna insipientia: Hinc liberi servis viliiores fiunt. Ecquid de servis loquor? Mulum si quis habeat multum curat ut agasonem illi optimum provideat, non improbum, non furacem, non temulentum, non artis suae imperitum: si autem filio paedagogum dare opus sit, casu et sine delictu obvium quemque excipimus: etsi hac arte nulla sit maior. Quid par illi arti, quae dirigendae animae et efformandae iuvenis menti et indoli incumbit? Qui tali instructus est facultate, plus diligentiae exhibeat oportet, quam quivis pictor aut statuarius.

ANTIPHONAE.

*In utrisque Vesp. Ant.* Qui suscepit unum parvulum talem in nomine meo, me suscipit. Alleluia.

*Ad Bened. Ant.* Beati mites, quoniam possidebunt terram: beati misericordes, quoniam misericordiam consequentur: beati mundo corde, quoniam ipsi Deum videbunt. Alleluia.

**DIE 26 APRILIS**

**IN FESTO**

**BEATI IOANNIS BOSCO CONFESSORIS**

**MISSA.**

INTROITUS. III, *Reg.* 4, 29. Dedit illi Deus sapientiam et prudentiam multam nimis, et latitudinem cordis quasi arenam, quae est in littore maris. Alleluia, Alleluia.

*Ps. CXII.* I. Laudate pueri, Dominum, laudate nomen Domini. Gloria Patri.

ORATIO.

Deus qui Beátum Ioánnem Confessórem tuum adolescentium Patrem et Magístrum excitásti, ac per eum, auxiliatrice Vírgine María, novas in Ecclésia tua famílias floréscere voluísti; concéde, quaesumus, ut eodem caritátis igne succénsi, ánimas quaerere, tibi-que soli servíre valeámus. Per Dóminum.

Lectio Epístolae B. Páuli Apóstoli ad Philippenses.

(*Philipp.* IV, 4-7).

Fratres, Gaudéte in Dómino semper: iterum dico, gaudéte. Modéstia vestra nota sit ómnibus homínibus: Dóminus prope est. Nihil solliciti sitis; sed in omni oratióne et obsecratióne, cum gratiarum actiÓne, petitiÓnes vestrae innotéscant apud Deum. Et pax Dei quae exúperat omnem sensum, custódiat corda vestra et intelligéntias vestras in Christo Jesu. De cétero, fratres, quaecúmque sunt vera, quaecúmque pudíca: quaecúmque iusta, quaecúmque sancta, quaecúmque amabilia, quaecúmque bonae famae, si qua virtus, si qua laus disciplinae, haec cogitáte. Quae et didicístis, et accepistis, et audístis, et vidístis in me, haec ágite: et Deus pacis erit vobíscum.

Alleluia, Alleluia. *ŷ*) *Ps. LXXVII*, 8-9. Filii, qui nascéntur et exúrgent, et narrábunt filiis suis ut ponant in Deo spem suam et non obliviscántur óperum Dei et mandáta eius exquirant. Alleluia. *ŷ*) *Ps. XXXV*, 9. Inebriabúntur ab ubertáte domus tuae: et torrén-te voluptátis tuae potábis eos. Alleluia.

*In Missis votivis extra Tempus Paschale dicitur:*

GRADUALE. *Ps. XXXI*, 8. Intelléctum tibi dabo, et ínstruam te in via hac, qua gradiéris, firmábo super te óculos meos. *ŷ*) Laetámini in Dómino et exultáte iusti, et gloriámini omnes recti corde.

Alleluia, Alleluia. *Ps. LI*. Ego autem sicut olíva fructífera in domo Dei, sperávi in misericórdia Dei in aetérnum. Alleluia.

*Post Septuagesimam omissis Alleluia et Versu sequenti, dicitur:*

*Ps. I*, 2-3-5. In lege Dómini fuit volúntas eius, et in lege eius meditábitur die ac nocte.

*ŷ*) Tamquam lignum quod plantátum est secus decúrsus aquárum: quod fructum suum dabit in témpore suo.

*ŷ*) Et fólium eius non défluet: et ómnia quaecúmque faciet semper prosperabúntur.

Sequéntia Sancti Evangélii secúndum Matthaéum.

MATTH., XVIII. 1. 5.

In illo tempore: Accesserunt discipuli ad Jesum, dicentes: Quis putas maior est in regno caelorum? Et advocans Jesus parvulum statuit eum in medio eorum, et dixit: Amen dico vobis, nisi conversi fueritis, et efficiamini sicut parvuli, non intrabitis in regnum caelorum. Quicumque ergo humiliaverit se sicut parvulus iste, hic est maior in regno caelorum. Et qui susceperit unum parvulum talem in nomine meo me suscipit.

OFFERTORIUM. *Ps. XXXIII, 12.* Venite, filii, audite me: timorem Domini docebo vos. Alleluia.

#### SECRETA.

Suscipe, Domine, oblationem mundam salutaris Hostiae et praesta, ut te in omnibus et super omnia diligentes, in gloriae tuae laudem vivere mereamur. Per Dominum.

#### COMMUNIO.

*Rom., IV, 18.* Contra spem in spem credidit, ut fieret pater multarum gentium, secundum quod dictum est ei. Alleluia.

#### POSTCOMMUNIO.

Corporis et Sanguinis tui, Domine, mysterio satiatis, concede, quaesumus; ut intercedente Beato Ioanne Confessore tuo, in gratiarum semper actione maneamus. Qui vivis.

#### ELOGIUM IN MARTYROLOGIO.

Augustae Taurinorum, natalis Beati Ioannis Bosco, Confessoris, Societatis Salesianae ac Instituti Filiarum Mariae Virginis Auxiliatricis Fundatoris, animarum zelo, et Fidei propagandae conspicui, quem Pius XI anno millésimo nongentésimo vigésimo nono Beatorum fastis adscripsit.

#### TAURINEN.

Beatorum Albo nuper adscripto Ioanne Bosco Piae Societatis Salesianae et Instituti Filiarum Mariae Auxiliatricis Fundatore, in votis erat Rectoris Majoris eiusdem Societatis ut Festum supradicti Beati Calendario et Proprio Instituti diei 26 mensis Aprilis insere-retur sub ritu duplici II classis cum Officio et Missa propriis, quorum schema S. Rituum Congregationis revisioni humiliter subiectum est.

Cum igitur ad iuris tramitem E. mus et Rev. mus D. nus Alexander Card. Verde, Relator, in Ordinariis Sacrorum Rituum Congregationis Comitiis, subsignata die ad Vaticanum habitis, praedictum Officium cum Missa et Ellogio in Martyrologio in honorem Beati Ioannis Bosco, Confessoris, proposuerit, E. mi et R. mi Patres, sacris tuendis Ritibus praepositi, audito R. P. D. Carolo Salotti Sanctae Fidei Promotore Generali, reque mature perpensa rescribendum censuerunt: pro gratia et ad E. mum Ponentem cum Promotore Generali Fidei. Die 7 Ianuarii 1930.

Eiusmodi Officii et Missae necnon Ellogii supradicti revisione peracta, hisque omnibus Sanctissimo Domino nostro Pio Papae XI per eiusmodi Fidei Promotorem Generalem relatis, Sanctitas Sua sententiam sacri ipsius Consilii ratam habens, suprascriptum Officium Proprium cum Missa et ellogium in Martyrologio adprobavit, atque in Festo Beati Ioannis Bosco die 26 Aprilis sub ritu duplici II classis ab universo Clero Piae Societatis Salesianae et ab Instituto Filiarum Mariae Auxiliatricis quotannis adhibendum benigne concessit: servatis Rubricis. Contrariis non obstantibus quibuscumque. Die 15 Ianuarii 1930.

C. Card. LAURENTI

*S. R. C. Praefectus.*

(L. ✠ S.)

PHILIPPUS DI FAVA, *Substitutus.*